

TUSI TAIALA

MO LE PULEA MA LE VA'AIA LELEI O I'A MA FIGOTA

O LE AFIOAGA O

LALOVI I MULIFANUA

Iuni 11, 1999

SAUNIA

Pule mamalu a Alii ma Faipule ma tagatanuu o le Afioga o Lalovi Mulifanua ma le Lagolagosua a le Ofisa o Faigafaiva o le Matagaluega o Faatoaga ma Faigafaiva.

FAASOLOGA

1	Upu Tomua	3
2	Autu	4
3	Faamatalaga e uiga i le Afioga	4
4	Tapenaga o Ienei Tusi Taiala	4
	4.1 Feiloaiga Muamua a le Afioga	4
	4.2 Faatalatalanoaga i Vaega e Tolu	5
	4.3 Komiti Faufautua o le Faasao	5
	4.4 Pasiaina o le Tusi Taiala	5
	4.5 Filifilia o le Komiti o le Faasao	5
5	Fuafuaga Faataatitia	5
	5.1 Tulafono Faalenuu : Faigafaiva le Talafeagai	6
	5.2 Faasalalauina Tulafono a le Afioga	7
	5.3 Ia Faasaina Upega ma Tili mata ninii	7
	5.4 Ia aoina mai i uta Alamea ma faatamaia ai	7
	5.5 Ia Faasaina Tu'iga ma Faamoa	8
	5.6 Ia Faasaina Fagotaga ma isi Afioga	8
	5.7 Ia Faasaina le toe lafoai o Lapisi i le Sami ma Matafaga	9
	5.8 Ia Faasa ona toe Fagotaina mai I'a ma Figota Iaiti	9
	5.9 Ia faasaoina ma Faateleina Amu	10
	5.10 Ia Taofia le Faamamaina o Sea i uta i le pa'u-matu	10
	5.11 Ia Taofia le laueseina o oneone mai le Matafaga	11
	5.12 Ogasami Faasaoina	11
	5.13 Iloiloina o le Gataifale mo le Faafaatoagaina o I'a ma Figota	12
	5.14 Ia unaia Faigafaiva i Tua'au ma Aoaoga	13
	5.15 Mana o Talosaga	14
6	Talosaga a le Afioga	14
7	Toe iloiloina o Ienei Tusi Taiala	14
	7.1 Otootoga	14
	7.2 Fuafuaga Faataatitia a le Afioga ma le Ofisa o Faigafaiva	14
8	Sui Filifilia o le Komiti Faufautua	15
9	Faigafaiva	16
10	Vaiga i le Afioga	16

1. UDU TOMUA

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le aufaifaiva
- le faaaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o nei tamaoaiga o le sami e faaitiitia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalosia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaitiiti ma le toagaogao o le aufaigaluga. Ae o seisi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioaga. O leni polokalame e pei ona faatinoina nei, ua fesoasoani tele i le faa-malamalamaina mo le silisfia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaoina o i'a ma figota ua tauau ona mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo faamatalaga faaopopo o leni tulafono.

O **Tulafono Laiti** a nuu ma afioaga ua amanaiaina e le Faamasinoga. O se tasi lea o auala ua tuu sao ai e le Malo le malosi i nuu ma afioaga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioaga o Lalovi i Mulifanua. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioaga taitasi.

Polokalame o le Faasaoina o le Gataifale i Nuu ma Afioaga

O le Polokalame o le Faasao na amataina e le Malo e taua mai lea i le auunaga a le Ofisa o Faigafaiva i le tausaga e 1995. I le amataga mai la o leni polokalame sa faapea ona lagolago malosi ai le Malo o Ausetalia e auala mai i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei muta ai i lea tausaga ona sa tauaveina loa e le Malo o Samoa le faatupeina o leni polokalame taua. I le taimi nei, ua oo atu le aofaiga i le 85 nuu ma afioaga ua faatinoina ai leni polokalame. Peitai, mai i le 85 lea, e na o le 52 nuu ma afioaga o loo tulai malosi ma faatauina pea leni polokalame. O le talitonuga ma le faamoemoe autu o le tele o nei afioaga o le silasila lea i le lumanai manuia mo tagata lautele o le afioaga aemaise ai o tupulaga lalovaoa.

O le polokalame o le Faasao e galulue soosoo-tauau iai le ofisa ma le afioaga i nisi o fuafuaga faataatitia aua se lumanai manuia aemaise o le toe faa-tamoaigaina o le gataifale. I le amataina o leni polokalame e faatinoina ai ni faatalatalanoaga ma vaega eseese o le nuu e pei o le vasega o matai, tina ma taulelea. O nei fefaasooaiga e faailoa mai ai faafitauli o loo faafeagai ma le gataifale o le afioaga. E talanoaina foi aafiaga ma mafuaaga o nei faafitauli ma soalaupule ai ni fofo. Ma sa faapea loa ona soalaupule ai e Alii ma Faipule, tagatanuu o le afioaga ma le ofisa nisi o fuafuaga faataatitia e foia ai nei faafitauli. O se faataitaga o se

fuafulaga faataatia a le afioaga i leni polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafulaga faataatia e tele ona faaogaina e afioaga mo le pulea ma le vaaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- tuiga, faamoa, seuga
- lama moli-uila i po
- fanaia
- i'a ma figota laiti
- ava-niu-kini
- upega ma tili mataninii

O nisi o fuafulaga o Tusi Taiala i le tele o afioaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O leni polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i leni polokalame.

2. AUTU

O le autu leni sa faatalatalanoaina ma malilie autasi i ai vaega taitasi o le afioaga ;

- 1. Ina ia puipuia le siosiomaga o le gataifale ma,**
- 2. Toe faatupulaia le tamaoaiga o le gataifale mo tupulaga o le lumana'i**

3. FAAMATALAGA E UIGA I LE AFIOAGA

O le afioaga o Lalovi e i le itu i matu i sisifo o le motu o Upolu ma o le faitauaofai o ona tagatanuu e tusa ma le 2000, e aofia ai matai, tina ma tamaitai, aumaga ma tamaiti. E le o faitaulia ai i latou ua malaga atu i atunuu i fafo e pei o Niu Sila, Ausetalia, Amerika, ma isi.

O Lalovi, e iai lona aau e mai lava i le itu i sasae seia paia le itu i sisifo i le mamao pe a ma le afa maila (1/2 maila). O le umi o le aau, pe a ma le tasi ma le afa maila (1 1/2 maila). O le vaega pito i loloto o le aloalo e tusa ma le 10 – 18 futu i taimi e pe ai le tai, ae 10 – 12 futu le loloto o vaega pito i sili ona papau.

O leni afioaga, e mamalu tele ona puleag aua e puleaina lelei e Alii ma Faipule o Lalovi. O le aumaga e lava saunia i taimi uma aua le tautuaina o matai. O matai latou te avatua fautuaga lelei mo ni mataupu tau lotoifale o le afioaga.

4. TAPENAGA O LENI TUSI TAIALA

O leni tapenaga sa saunia lava e alii ma faipule ma tagatanuu o Lalovi faatasi ai ma le lagolagosua a le Ofisa o Faigafaiv, o le Matagaluega o Faatoaga ma Faigafaiva. O se oototoga leni i le tapenaga o lea Tusi Taiala ina ua maea ni fonotaga sa faia, ua taua i lalo.

4.1 Feiloaiga Muamua ma le Afioaga

I le amataga mai o le polokalame, sa faapea ona faatoai mai se finagalo o le Pule Mamalu a Alii ma Faipule i le Ofisa o Faigafaiva e faailoa ai lo latou fiafia e auai i le Polokalame mo le Puipuiga o le Gataifale, lea na faafesootai mai e Mauisii Mose i le aso 8 o Mati, 1999. O le aso 5 o Me sa tauaofia ai le uluai fono a sui o le

Ofisa ma le Afioga, e faamalamalama ai le polokalame ma, pe taliaina e le afioga. O le fonofoi lena sa auai ai Alii ma Tamaitai Ofisa e taliaina aloaia se finagalo o le afioga i le polokalame. O le maea o lenei feiloaiga muamua na taliaina lelei ai e le afioga le polokalame.

4.2 Faatalatalanoaga i Vaega i Tolu

O le taua o lenei faatalatalanoaga, ina ia vaevaeina le afioga i vaega e iai matai, tina ma aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioga ona faailoa mai faafitauli o loo aliae mai i le siosiomaga o le gataifale o Lalovi. Sa faapea foi ona sailia ai ma ni aafiaga o nei faafitauli. O ni fofo, aemaise faatinoga ma i latou e faatinoina nei fofo sa faailoa mai.

4.3 Komiti Faufautua o le Faasao

O le matafaioi a le komiti faufautua o le tuu-faatasia lea o faamaumauga ma faamatalaga mai vaega taitasi, ma sa mafai ai ona latou tapenaina se ata faataitai o le Tusi Taiala.

4.4 Pasiaina o le Tusi Taiala

O le faagasologa atoa o nei fuafuaga faataatitia a le afioga e aofia ai foi ma fuafuaga faataatitia e lagolagosua mai ai le Ofisa o Faigafaiva.

O le Tusi Taiala sa tuuina aloaia i le fonofoa matai, e sui o le komiti faufautua ma sui o le Ofisa o Faigafaiva mo le pasiaina ma amata faatinoina ai loa galuega ma matafaioi a vaega taitasi. O le fonofoi lea e filifilia ai loa ma le Komiti o le Faasao, e taitaia le faagaoioiga o fuafuaga ua uma ona faataatitia.

4.5 Filifilia o le Komiti o le Faasao

O le Komiti o le Faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioga. E maea loa le pasiaina o le Tusi Taiala, o le a fesootei lava le Ofisa ma le Komiti i tulaga uma e manaomia ai le fesoasoani e pei ona autasi ma tamauina i le Taiala.

5. FUAFUAGA FAATAATITIA

O fuafuaga faataatitia o ni gaioga ua faamoemoe e faaono foia ai faafitauli ua fa'aalia ma faailoa mai e vaega eseese o le afioga. E lua (2) ituaiga o fuafuaga, ma o le fuafuaga ua aupito sili ona taua o **fuafuaga faataatitia a le nuu**.

O le isi vaega o fuafuaga faataatitia o le Ofisa o Faigafaiva ma o nei fuafuaga, o le a tuuina atu o fautuaga ma fesoasoani i nisi auala e pei o aoaoga ma le tufaina atu o pepa o faamatalaga i mataupu e fesootei i le gataifale. O galuega uma lava e faatinoina e le Ofisa o Faigafaiva, e ao ona faamaonia e le faatonu lagolago (Assistant Chief Executive Officer) a le Matagaluega o Faatoaga ma Faigafaiva.

I taimi o faatalatalanoaga i vaega taitasi, e tele ni mafuaga sa faailoa mai ae auga lava i le faafitauli ogaoga, o le faaititia lea o i'a ma figota i le aloalo ma le aau o le afioga o Lalovi.

O mafuaaga ma o latou aafiaga i le siosiomaga o le gataifale sa faapea ona iloiloaina ma sailia. O tali o faafitauli ma fofo, poo auala e foia ai na iloiloaina foi i faatalatalanoaga. E le gata i lea, sa faailoa mai ai foi ma vaega latou te faatinoina nei galuega.

O le vaega i lalo o le a auililiina atu ai atoataoa fuafuaga faataatitia sa aoina mai i vaega taitasi ma tuufaatasia e le komiti faufautua ma le lagolagosua a le Ofisa o Faigafaiva.

Tulafono Autu Tau Faigafaiva (1988) : O le tulafono a le Malo o Samoa e ;

(1) Faasaina ai Faigafaiva-le-Talafeagai.

(2) Faamalosia ai le laiseneina o Vaa-Fagota.

Tulafono Faatonutonu Mo le Laiti Faatapulaaina o I'a ma Figota (1995) : O le tulafono lea e faatapulaaina ai le laiti o i'a ma figota, mo le fuaina o mataupega.

Tulafono Laiti : O tulafono a nuu ma afioaga ua amanaiaina e le faamasinoga.

5.1 FAAMALOSIA TULAFONO FAALENUU E FAASAINA AI FAIGAFAlVA-LE TALAFEAGAI

Na faalia e vaega taitasi i taimi o faatalatalanoaga o loo faaauuina pea le faaogaina e faifaiva o fanai'a, ava niu kini ma vailaau oona i fagotaga. O nei faigafaiva-le-talafeagai ua mautinoa lo latou tulaga ogaoga i le faatamaiaina o le siosiomaga o le gataifale, e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auala faafaigafaiva e umi ma tele se taimi e toe faafoi ai i le lelei sa iai.

FUAFUAGA FAATAATITIA A LE AFIOAGA

Talu ai ona o le tulaga pagatia ua iai le gataifale o lenei nuu o Lalovi i Mulifanua, o lea ua ae ai se finagalo autasi i le Komiti faufautua ina ia matua faamalosia tulafono a le afioaga e faasaina ai faigafaiva-le-talafeagai e pei o fanai'a, ava niu-kini, ma vailaau oona. O le puipuiga ma le faamamaluina o nei tulafono o le a i aao lava o le pule mamalu a alii ma faipule faatasi ai ma le lagolagosua a tagatanuu o le afioaga.

FAUTUAGA

Ia toe faamalosia ma faamamaluina tulafono ua taua i lalo a le afioaga mo le faasaina o faigafaiva le talafeagai.

TULAFONO

Mo le mamalu o le atunuu atoa ao ma tagatanuu o Lalovi:

Ua matua faasaina lava faigafaiva le talafeagai e pei o fanai'a ava niukini, ma vailaau oona ona toe faatinoina i gataifale o le afioaga o Lalovi.

FAASALAGA

Mo tagata o le afioaga e solia lenei tulafono, o le a faasalaina i le le i lalo ifo o le 10 pusaapa poo le 10 aumatua. Sa faalia foi e le komiti o le a fuafua lava le faasalaga i le matuia o le solitulafono.

O tagata mai isi afioaga o le a molia sao i le Tulafono Autu Tau Faigafaiva ma le Tulafono Laiti a le Afioaga.

FUAFUAGA FAATAATITIA A LE OFISA O FAIGAFAlVA

O le a fesoasoani le Ofisa i le tufatufaina o pepa o faamatalaga i faigafaiva-le-talafeagai aemaise ai le faatinoina lea o suesuega ma moliaga o tagata ua faamaonia lona faationina o nei faigafaiva i le faamasinoga a le Malo o Samoa.

5.2 FAASALALAUINA TULAFONO A LE AFIOAGA

O faasalalaua i leitiu, televise ma nusipepa o nisi ia o auala talafeagai lelei e faalauteleina ai tulafono a le afioaga. O le a silafia ai e le mamalu o le atunuu, malamalama ma manino lelei i le faatauina ma le puipuia o le siosiomaga o Lalovi. O le Komiti o le Faasao o le a latou faamaopopoina ma tapenaina faasalalaua o tulafono.

Autu o le Faasalalaua: "Puipuiga o le Gataifale o Lalovi"

5.3 IA FAASAINA UPEGA MA TILI MATANINII

O le faaogaina o upega ma tili mataninii ua maitauinale tele o i'a ninii ua faatamaia ai. Ua iai le talitonuga o le a oo atu i se tulaga faaletonu i'a maua pe a faaauuina pea nei ituaiga faigafaiva. O le a oo ina faaititia i'a ma figota e mafai ona oo atu lo latou lapopoa e maua ai le avanoa e fanafanau ma tautuufua ai.

FUAFUAGA FAATAATITIA A LE AFIOAGA

Ua faailoa mai e le komiti o le faaogaina o upega ma tili mataninii, o se tasi lea o mafuaaga ua faaititia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaogaina i fagotaga i gataifale o le afioaga. Ua faapea foi ona faaalua mai e le afioaga lo latou matua lagolagoina o le Tulafono Faatonutonu o Faigafaiva a le Malo ua iai nei mo le faatapulaaina o mataupega ma tili.

TULAFONO

Ua matua faasaina lava ona tooe fagotaina upega tatao e i lalo ifo o le 2 inisi (50 mm) ona mataupega, faapea foi ma tili, ia le i lalo ifo o le 1.2 inisi (30 mm) i gataifale o Lalovi

FAASALAGA

O soo se tagata o le afioaga e solia lena tulafono o le a faasalaina i le \$100.00

Mo tagata mai isi afioaga o le molia ma faasalaina i le tulafono faatonutonu o faigafaivaa le Malo o Samoa.

FUAFUAGA FAATAATITIA A LE OFISA O FAIGAFIIVA

O le lagolagosua mai le Ofisa o Faigafaiva e ala i lana polokalame fesoasoani, o le tuuina atu lea o faamatalaga e soga faamautuina ma faamaopopoina ai lena tulafono.

5.4. IA AOINA MAI UTA ALAMEA MA FAATAMA'IA AI

O le alamea o se meaola o le ituaiga o le aveau ma e nofo i luga o le aau. O lena meaola e na te aia meaola ninii ua taua o POLIPE o loo tutupu mai ai amu. A oo ina faateleina le alamea o le a faapena ona latou faatamaiaina se vaega tele o le aau ma avea ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faaumatia le alamea i le vaevaeina o lona tino i le sami, aua e mafai ai e itu tino ona faatupuina ma ai nisi alamea fou.

E pau le auala e mafai ona tapeina ai lena meaola o le aoina mai lea i uta i le pau mautu e faamagoina ai pe tanuina foi, pe susunuina. E mafai ona faaogaina lona tino pe a mago, ma o se faalelei eleele mo faatoaga ma mea toto.

FUAFUAGA FAATAATITIA A LE AFIOAGA

Ua faailoa mai e le afioaga, o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta mo le

faatamaiaina o lenei meaola faalafua.

FAUTUAGA

Ua fautuaina e le komiti faufautua o le aoina mai i uta o alamea, o le a faatinoina lava e tagatanuu o le afioaga. O le faatinoina o lenei fuafuaga, o le a aoina tai ono masina alamea ma aumai i le pau matu e faatamaia ai ma faaogaina mo faalelei eleele.

FUAFUAGA FAATAATITIA A LE OFISA O FAIGAFAIVA

E leai se polokalame a le malo ua fuafuaina e totogi ai le faatamaiaina o alamea, vagana ai ni fautuaga e fesoasoani atu ai le Ofisa i auala e talafeagai e tineia ai lenei meaola faalafua, e ala lea i pepa o faamatalaga ua maea ona saunia.

5.5 IA FAASAINA TUIGA MA FAAMO

O amu ua maitauina lona taua i le siosiomaga i le gataifale ona ua mautinoa ua avea lea ma nofoaga mo le anoano o meaola o le sami. Afai o le a faatamaiaina amu o lona uiga ua afaina foi le tele o meaola o loo nonofo ai. O tuiga, faamoa ma seuga o nisi nei o ituaiga fagotaga e le talafeagai ua matua faaleagaina ai amu aemaise ai figota laiti. Afai ae faaauuina pea lenei ituaiga faigafaiva o lona uiga o le a sili atu ona tele se afaina o amu o loo fai ma nofoaga (alofaga) o i'a ma figota.

FUAFUAGA FAATAATITIA A LE AFIOAGA

Na faalia e vaega taitasi le tatau ona faia o se tulafono e faasaina ai tuiga, faamoa ma seuga i le gataifale o Lalovi aua ua mautinoa le faaleagaina ai uma ma meaola ninii o le gataifale. Ua matua lagolagoina e le komiti lenei tulafono

TULAFONO

Ua matua faasaina ona toe faatinoina faigafaiva-le-talafeagai e pei o tuiga, faamoa, suega poo nisi lava faigafava-le-talafeagai i gataifale o Lalovi.

FAASALAGA

O i latou uma e solia lenei tulafono o le a molia sao i le Tulafono Autu Tau Faigafaiva (1988).

FUAFUAGA FAATAATITIA A LE OFISA O FAIGAFAIVA

O le a fesoasoani mai le Ofisa i le faamautuina ma le faamalositia o lenei tulafono. O le a mafai foi ona tuuina atu ni pepa o faamatalaga e uiga i mea uma ua taua. E lagolagoina foi e le Ofisa soo se fuafuaga a le afioaga ua talafeagai lelei ma le tulafono mo le faasaoina o amu.

5.6. IA FAASAINA FAGOTAGA MAI ISI AFIOAGA

Ua maitauina le toatele o tagata mai isi afioaga ua latou fagotaina gataifale o le afioaga o Lalovi. ua le gata i lea, ua latou faatamaia foi le gataifaale i ni auala le talafeagai ma ua utiuti ai le tamaoaiga e maua mai i aau ma aloalo o loo faalagolago iai le afioaga.

FUAFUAGA FAATAATITIA A LE AFIOAGA

Ua iai se fuafuaga a le afioaga, o le a faia se tulafono e faasaina ai tagata mai isi afioaga ona toe fagogota fua i le gataifale o Lalovi. O le autu moni o lenei tulafono, ona o nei faigafaiva mai isi afioaga o loo latou aumaia faigafaiva-le-talafeagai ma faatinoina i lo latou gataifale, ua tele ai le ogaoga o le faaleagaina.

TULAFONO

Ua matua faasaina lava tagata mai isi afioaga ona faatinoina faigafaiva-le-talafeagai e pei o fanai'a, ava niu

kini vailaau oona, tuiga, faamoa poo nisi lava faigafaiva-le-talafeagai i le gataifale o Lalovi.

FAASALAGA

O i latou uma e solia lenei tulafono o le molia sao i le Tulafono Laiti o Faigafaiva a le afioaga.

FUAFUAGA FAATAATITIA A LE OFISA O FAIGAFIIVA

O le a fesoasoani atu le Ofisa i le faamallosia ma faamautuina o lenei tulafono.

5.7 IA FAASAINA LE TOE LAFOAI O LAPISI I LE SAMI MA LE MATAFAGA.

O le faasaina o le lafoai o lapisi ma otaota i le sami, ua avea ma mafuaaga o le faateleina ai o namu, ma manunua ai nisi o faifaiva i atigiapa, atigifagu ma uamea. Ua faapena ona avea ma puna'aga o faamai ma tulai mai foi o se nofoaga le talafeagai mo le ola lelei o ia ma figota i le gataifale.

FUAFUAGA FAATAATITIA A LE AFIOAGA

O le a faamallosia e le afioaga le faasaina ona toe lafoai lapisi i le sami ma le matafaga, ae saunia ni galuega mo le afioaga atoa, e faamama ai lapisi, e pei o le fausiaina o fata-lapisi poo le eliina o se lua e lafoai iai.

TULAFONO

Ua matua faasaina ona toe lafoai otaota ma lapisi e pei o pepa iila, uamea, atigi apa, atigi fagu, meaola mamate, ogalaau, ma soo se ituaiga lapisi, e aafia ai le siosiomaga o le gataifale o Lalovi.

FAASALAGA

Soo se tagata o le afioaga e solia lenei tulafono o le a faasalaina i le \$50.00, poo le 1 le aumatua (puaa). O tagata mai isi afioaga e solia lenei tulafono o le a molia sao i le Tulafono Laiti a le afioaga.

FUAFUAGA FAATAATITIA A LE OFISA O FAIGAFIIVA

O faamatalaga eseese e faatatau i aafiaga o le aafiaga o le gataifale ma ona tamaoaga, o le a fesoasoani atu ai le Ofisa e ao-tauina le afioaga i le taua o le teumaluina o otaota ma lapisi i nofoaga talafeagai.

5.8 IA FAASA ONA TOE FAGOTAINA MAI I'A MA FIGOTA LAITI

O le tele o afioaga ua latou faaalai mai le toatele o faifaiva latou te fagotaina mai i'a ma figota laiti. O le mafuaaga lea ua vave faaititia ai i'a ma figota, ona ua le maua se avanoa e tautuufua ma fanafanau ai nei meaola.

FUAFUAGA FAATAATITIA A LE AFIOAGA

Ua iai le fuafuaga a le afioaga, o le a lagolagoina le tulafono o faigafaiva mo le lapopoa faatapulaaina e fagotaina ai i'a ma figota.

TULAFONO

Ua matua faasaina ona toe fagotaina i'a ma figota laiti mai le gataifale o Lalovi, e pei ona faaalai e le komiti.

FAASALAGA

O tagata o le afioaga e solia lenei tulafono, o le a faasalaina i le \$50.00 po o le 1 le aumatua (puaa) pe sili atu foi.

O tagata mai isi afioaga o le a molia sao i le Tulafono Faatonutonu a le Malo o Samoa.

FUAFUAGA FAATAATITIA A LE OFISA O FAIGAFAIVA

O le a fesoasoani le ofisa mo le tapenaina o Tulafono Laiti e faasaina ai fagotaga o i'a ma figota e laiti ifo nai lo le fua faatapulaaina o i'a ma figota. E le gata i lea, ua maea tapenaina foi pepa o faamatalaga e faamalamalama ai le puipuiga o le fagotaina o i'a ma figota laiti.

5.9 IA FAASAOINA MA FAATELEINA AMU

O le puipuia ma le faasaoina o amu, o se itu lelei lea mo le faasaoina o i'a ma figota o loo faalagolago iai mo meaai ma nofoaga. O le faia o se ogasami faasaoina ma le taofia o faigafaiva-le-talafeagai, o nisi ia o fuafuaga tatau ma le talafeagai mo le faateleina o amu

FUAFUAGA FAATAATITIA A LE AFIOAGA

O le faia o se ogasami faasaoina, o se auala na faailoa e le afioaga e ala i le komiti, e mautinoa lona lelei mo le faateleina o amu, i'a ma figota. Na faailoa foi lo latu finagalo, o le a mataituina ma vaaia lelei lea nofoaga e Alii ma Faipule aemaise o ona tagatanuu.

FUAFUAGA FAATAATITIA A LE OFISA O FAIGAFAIVA

O le a fesoasoani le Ofisa i le faamalamalamaina o itu lelei mo le faateleina o amu, aemaise o le tufaina atu o pepa o faamatalaga e faalauiloa atili ai lenei mataupu.

5.10. IA TAOFIA LE FAAMAMAINA O SEA I UTA I LE PA'UMATU

O le figota o le sea, o se tasi o mataiai a le atunuu. Ua maitauina lona tulaga faaitiitia i le gataifale. E le gata i lea, ae ua tauau ina mou atu ona o le soona fagotaina ma le le faaeteete e tagata faifaiva, aemaise o le lauina i le paumatu. Afai o le a faaauauina pea, e mautinoa o le a le toe maua se sea i gataifale o le afioaga.

FUAFUAGA FAATAATITIA A LE AFIOAGA

Na faaalua e le Komiti o le lauina mai uta o pau-sea ma faalala ai, o se tasi lea mafuaaga o le faaitiitia o nei figota i le gataifale O lea ua ae ai se tofai i le Komiti e faia se tulafono ina ia taofia ai le toe lauina mai i uta o nei figota ma faamamaina ai.

TULAFONO

Ua matua faasaina ona toe lauina mai i uta pau sea pe faamamaina foi i le paumatu

FAASALAGA

O soo se tagata o le afioaga e solia lenei tulafono o le a faasalaina i le sala-tupe e \$50 poo le 1 le aumatua (puaa)

O tagata mai isi afioaga, e molia sao i le Tulafono Faaatonutonu a le Malo.

FUAFUAGA FAATAATITIA A LE OFISA O FAIGAFAIVA

Ua matua lagolagoina malosi e le Ofisa le tulafono lenei a le afioaga ma fesoasoani ai i le tuuina atu o pepa o faamatalaga e faamautuina ai lenei fuafuaga tatau.

5.11 IA TAOFIA LE LAUESEINA O ONEONE MAI LE MATAFAGA.

O le tele o le oneone ua laueseina e tagata mo a latou galuega fai, ma le tanuina o o latou tafa-fale, ua avea ma tulaga faigata ma le tele ai o apitagalu ma matafaga tafia. O le faaauauina pea o le asuina ma le laueseina o nei oneone, o le a avea ma auala e le toe vaaia ai le tele o meaola o le gataifale o faaogaina nei nofoaga ma o latou ofaga.

FUAFUAGA FAATAATITIA A LE OFISA

Na taua e le afioaga e ala mai i le komiti, o se tulaga le talafeagai tele le laueseina o oneone mai le matafaga. Ma ua mataituina lelei foi soo se tagata na te solia lenei aiaiga, o le a faia loa iai le finagalo o le afioaga.

TULAFONO

Ua matua faasaina soo se tagata na te lauina pe asuina oneone o le talafatai o le afioaga o Lalovi, i faiga le talafeagai ma le gataifale.

O tagata ese e manaomia le Pemitā faataga e tusa ai ma aiaiga a le Malo

FUAFUAGA FAATAATITIA A LE OFISA O FAIGAFAIVA

O le a fesoasoani malosi le Ofisa o Faigafaiva i le faamautuina o fuafuaga a le afioaga ma lagolagoina le mataupu e uiga i le laueseina o oneone mai le gataifale o Lalovi.

5.12 OGASAMI FAASAOINA

O se vaega o le gataifale ua faasaoina e le tatau ona toe aafia i ni faigafaiva. O le avea o se nofoaga o le gataifale ma nofoaga faasao, e ao ona aafia ai le malupuipua o le siosiomaga ma ona tamaoaiga i figota ma i'a.

O lenei nofoaga faasao, o le a faasaoina ai amu, aau, faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota o loo aumau i vaega faasaoina, ma o le a tafefea atu o latou fua fanau ma faatupuina ai nisi meaola i nofoaga ua le maua ai nisi i'a ma ni figota. O le a le pine ae manuia ai lo tatou atunuu faapea foi tupulaga o le lumanai.

FUAFUAGA FAATAATITIA A LE AFIOAGA

- Galulue faatasi ma le lagolagosua a le Ofisa o Faigafaiva i le iloiloina o se vaega talafeagai o le gataifale e avea ma vaega faasaoina
- Talanoaina ma auiliiliina le lipoti ma ia faia se faaiuga i le faavaeina o le ogasami faasaoina.
- Faatinoina le mataituina, tausiga ma le vaaia lelei o le ogasami faasao

FUAFUAGA FAATAATITIA A LE OFISA O FAIGAFAIVA

- Faatinoina le iloiloga o le tulaga talafeagai o se vaega o le gataifale e avea ma vaega faasaoina
- Saunia le lipoti mo le tuuina aloaia atu i le Komiti o le Ofisa ma le Fono

TULAFONO

Ua matua faasaina soo se tagata ona uia, taele, solia, po o le faatinoina ai foi o soo se ituaiga o faigafaiva poo se isi lava mea i totonu o lenei ogasami faasao i Lalovi.

FAASALAGA

Soo se tagata e solia lenei tulafono o le a faasalaina i le 10 aumatua (puaa).
O tagata mai isi afioaga o le a molia sao i le Tulafono o Faigafaiva a le Malo.

5.13 ILOILO LE GATAIFALE MO LE FAAFAATOAGAINA O I'A MA FIGOTA

O le tufaina atu ma le faafaatoagaina, e faatatau lea i le auina mai o ni figota poo ni i'a mai isi atunuu ma tufaina atu e faola i se ogasami ua talafeagai. O le faafaatoagaina ua faatatau lea i le faaolaina o figota i se nofoaga ua saunia o nisi nei o atinae mo le faatupuina o figota aua le toe faatamaoagaina o le gataifale mo taumafa o se afioaga. O nei auala faa-atinae e moomia ai lava le galulue faatasi ma le faamaoni o le afioaga ina ia ausia se taunuuga lelei.

Faamatalaga Faapoopo o le toe tufaina atu o Figota

O le tufaina o figota i le tele o atunuu o le Pasefika ua mautinoa le tele o ni faamanuiaga na mafai ona seleseleina e nei atunuu. I Fiti, na mafai ona toomaga i ai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi mea. I le Atu Kuki e tusa ma le 280 aliao na tufaina atu i ai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina i fale gaosi faamau. I le 1990 na tufaina atu ai i sami o le motu o Namua i Aleipata le 40 o aliao, ma na faatamaia i le afa malosi o Ofa.

I le tele o vaega o le aloalo ma le aau o Samoa o loo maua ai figota e pei o le pae, asi ma le tugane. O nei figota ua mautinoa lo latou faaitiitia talu ai o le soona fagotaina e tagata mo taumafa ae ua faapena foi ona faatamaia o latou nofoaga e afa malolosi. I le tele o nofoaga ua le toe maua ai nei figota, pau le faamoemoe o le aumaia lea o ni figota mai nisi atunuu ma tufaina atu i ai aua le faaolaina i nei vaega o le gataifale

FUAFUAGA FAATAATITIA A LE AFIOAGA

- * Galulue ma le aufaigaluega a le ofisa o faigafaiva i le faatinoina o le iloiloga pe talafeagai ma lelei le gataifale mo le faafaatoagaina o figota.
- * Auiliiliina o le lipoti i suesuega o le gataifale, ma ia faia se faaiuga i le faatinoina o nei atinae i totonu o Lalovi.
- * galulue faatasi mo le puipuia o nei atinae, ma vaai lelei tagata o loo latou faatamaia ina pe solia tulafono e faatatau i le faasao.

FUAFUAGA FAATAATITIA A LE OFISA O FAIGAFIIVA

O le a oo atu se Alii Ofisa mai le vaega suesue, ma suesueina le gataifale o le afioaga, ina ia faamaonia le talafeagai mo le faaolaina ai o ni figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atinae.

- * Fesoasoani mai le Ofisa e ala lea i le vaaia lelei ma le mataituina o le sologa lelei o le tuputupu ae o figota
- * Saunia ni aoaoga mo le faamalamalamaina o olaga faanatura o nei figota

5.14 IA UNAIA FAIGAFIIVA I TUAU MA AOAOGA

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina, pe afai ae faaititia le fagotaina o nei vaega o le gataifale. O se tasi lea o auala e faaleleia ai le tamaoaiga o le gataifale, o le fagotaina o ogasami o le gataifale e lei fagotaina lava, aemaise o tuaau mamao.

FUAFUAGA FAATAATITIA A LE AFIOAGA

Ua iai le talitonuga i le Komiti e ao ona unaia ma faamalasia faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ae le gata i lea ae o le a mafai ai ona toe faatupulaia ma faaleleia le tamaoaiga o le tele o vaega o le gataifale, aemaise i le aloalo, ua faaleagaina. Ua talosagaina foi le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se Alii Ofisa o Faigafaiva ua iai se tomai faapitoa i mea tau faigafaiva.

FUAFUAGA FAATAATITIA A LE OFISA O FAIGAFAlVA

Talu ai ona o le tele o nuu e leai ni vaa e talafeagai mo fagotaga i tuaau, o lea ua taumafai ai le Ofisa o Faigafaiva e saili fesoasoani mo le faafaigofie o le mauaina o ni vaa talafeagai mo lea faamoemoe. O le a iloilo ina foi e le Ofisa o Faigafaiva manaoga i auala tau faigafaiva e ao ona fesoasoani ai e aoaoina ai le mamalu o le autautai o le afioaga. O itu taua o le a aafia i nei aoaoga e iai le teuina ma le vaaia lelei o i'a, saogalemu i luga o le sami, tausiga o vaa afi, faaasuina o i'a, ma isi lava mataupu taua.

FAAMATALAGA FAAODODO

Vaa mo fagotaga i tuaau: O le leai o ni vaa talafeagai mo fagotaga i tuaau o le ala lea ua avea ma vaegase i le unaia o faigafaiva i tuaau. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tuaau. I sailliliga a le Ofisa o Faigafaiva i se vaa talafeagai, ua filifilia ai le vaa e i le va o le 14-16 futu. O lona tau e \$9,800, tuufaatasi i ai ma lona afi (15HP) ma nai mea fagota, o le taula, ofu faola mo le saogalemu i luga o le sami, ma foe. O loo iai se fesoasoani a le Faalapotopotoga a le Iuni a Europa (ED) mo le faatupeina o le 65% o le tau atoa o le vaa (\$9,800), o le 35%, o le sao lea o se afioaga poo se faalapotopotoga ua auai i le polokalame a le Vaega o Faigafaiva.

O lenei ituaiga vaa e mafai ona faaaauvaaina e ni tagata se toalua pe toatolu foi, ma e mafai ona faaogaina lenei vaa i faigafaiva i tuaau. O le a faia foi ni aoaoga mo le saogalemu i luga o le sami, teuina ma le vaaia lelei o i'a, tausiga o vaa atoa ai ma le faiga o mea fagota.

5.15 MANA O TALOSAGA

O talosaga ma talitonuga tuufaatasi faalelotu o se tasi lea o faamoemoega ua talitonuina lona taua aua le puipua ma le faasaogalemuina o le siosiomaga o le gataifale ma ona tamaoaiga.

FUAFUAGA FAATAATITIA A LE AFIOAGA

O le sao taua o le aufailotu o le unaia lea ma faamalasia i tagata-nuu ina ia latou faatauina le taua o le puipua ma le faasaoina o le siosiomaga o le gataifale ma ona tamaoaiga. O se sao taua tele le tapueina o finagalo o tagata ina ia galulue faatasi aua le foia o faafitauli o loo aliae mai i le siosiomaga o le gataifale ma ona tamaoaiga. Na taua e vaega eseese o le nuu, le aoga ma le taua o talosaga mo le foia o faafitauli o loo feagai nei ma faigafaiva ma le siosiomaga o le gataifale o Lalovi i Mulifanua. Sa lagolagoina foi e le Komiti lenei fautuaga ma fautuaina ai le taupati faatasi o le aufailotu ma le mamalu o le afioaga.

FUAFUAGA FAATAATITIA A LE OFISA O FAIGAFAIVA

O le a mafai ona tuuina atu ni fesoasoani mai le Ofisa o Faigafaiva mo le mamalu o le Aufailotu e ala i pepa o faamatalaga ma tautalaga ina ia fesoasoani i le fausiaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

6. TALOSAGA

6.1 TALOSAGA A LE AFIOAGA

Na talosagaina e le afioaga e ala i sui na auai na auai i le fonotaga ma le Ofisa o Faigafaiva i taimi o faatalatalanoaga i Vaega e Tolu. Na faamautuina uma nei talosaga e le komiti ma tuuina mai ai loa i le Ofisa mo le toe faamautuina atili ma faataunuuna ai, pe a maea ona taliaina aloia lenei Tusi Taiala e le pule mamalu a Alii ma Faipule i le fono tele e faia i le Aso 11 o Iuni 1999. O talosaga uma sa tuuina mai o loo faailoa atu i lalo.

- Ogasami Faasaoina
- Vaa Fagota
- Tilapia
- Faisua, Aliao, Alii ma isi Figota
- Aoaoga i mea tau faigafaiva (fausiaina o mea fagota, tausaiaina o afi o vaa, tausia ma le vaaia lelei o faisua, ma isi aoaoga)

7. TOE ILOILOINA O LENEI FUAFUAGA TATAU

7.1 OTOOTOGA

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua ma le aoga o lenei polokalame i totonu o nuu ma afioaga, aemaise o ni auililiga maumaututu, i le tulai mai o galuega fai a le afioaga ma le ofisa i le faataunuuna o fuafuaga faataatitia e pei ona taua i luga. O lenei foi iloiloga e lipotia ai le manuia ma ni faaletonu o le polokalame talu ona faavaeina i le afioaga.

7.2 FUAFUAGA FAATAATITIA A LE AFIOAGA MA LE OFISA O FAIGAFAIVA

Ua iai le maliliea a le Komiti faufautua a le afioaga ma le Ofisa o Faigafaiva o le a toe auililiina lenei Fuafuaga Tatau pe a maea le ono(6) masina talu ona pasia lenei tusi i le Fono Tele i le aso 11 Iuni 1999. O le a toe feutaga'i le Komiti ma le Ofisa i se aso o le a atofaina pe a atoa le 6 masina.

8. SUI FILIFILIA O LE KOMITI O LE FAASAO

KOMITI A MATAI

Taulapapa Iosia
Taupa'ū Eti
Taupa'ū Autalaga
Taulapapa Alaiava
Sevaaetasi Iakimo

KOMITI A TINA

Arona Malaeulu
Falute
Nele
Tina

KOMITI A AUMAGA

Faletolu Taulapapa
Arona
Tuati
Sopoga
Tuna
Alofa
Leao

KOMITI O LE FAASA O LALOVI 2006



9. FAIGAFIIVA

FAAMATALAGA

O le faitau aofai o tane faifaiva e fagogota i le sili atu ma le tasi le aso ole vaiaso	40 – 60
O le faitau aofai o tina faifaiva e fagogota i le sili atu ma le tasi le aso o le vaiaso	20 – 30
O le aofaiga o tagata fagogota i tuaau mai le tasi le aso o le vaiaso	10 – 20
O le aofaiga o paopao e faaogaina mo faigafaiva i totonu o le afioaga	30 – 60
O le aofaiga o alia fagogota o loo faaogaina mo faigafaiva a le afioaga	2
E le faatagaina ni tagata fagogota mai isi afioaga ona fagogota i le gataifale o Lalovi	

10. VAAIGA I LE AFIOAGA



EFKS Lalovi



Ekalesia Aletotisi

